

祥刑典

祥刑典第二十三卷

律令部彙考九

宋

孝宗隆興元年五月壬申申嚴鋪翠銷金及神祠僭擬之禁 按宋史孝宗本紀云云

隆興二年正月癸巳修三省法九月丁酉嚴贓吏法 按宋史孝宗本紀云云

乾道三年春正月甲辰詔廷尉大理官毋以獄情白宰執探刺旨意爲輕重 按宋史孝宗本紀云云
云 按刑法志三年詔曰獄重事也稽者有律當者有比疑者有讞比年顧以獄情白于執政採取
旨意以輕爲重甚亡謂也自今其祇乃心敬于刑惟當爲貴毋習前非不如吾詔吾將大寘于罰罔
攸赦

乾道四年四月戊午詔販牛過淮者論如興販軍需之罪七月壬戌申禁異服異樂十月甲午禁歸
正人藏匿金人者十一月甲戌嚴盜賊法 按宋史孝宗本紀云云

乾道六年正月詔強盜復用舊法閏五月詔監司所舉失實依舉清要官法定罪八月復置敕令所

又虞允文上乾道敕令格式是年又詔大辟但奏爲首應坐者爲從不應坐而奏者罪之 按宋史

孝宗本紀乾道六年正月丁巳復強盜舊法其四年十一月指揮勿行五月閏月壬午詔監司帥臣

舉守令藏否失實依舉清要官法定罪八月癸丑復置詳定一司敕令所是月虞允文上乾道敕令

格式 按刑法志六年臣僚請今後大辟只以爲首應坐死罪者奏爲從不應坐死者先次決遣及

流徒罪不許作情重取旨不然則坐以不應奏而奏之罪從之 又紹興以來續降指揮詔大理寺官

詳定可否六年刑部侍郎汪大猷等上其書號乾道敕令格式 按玉海六年八月二十八日虞

允文言將紹興敕與嘉祐敕及建炎四年至乾道四年續旨參酌刪修今成敕十二卷令五十卷格

三十卷式三十卷目錄百二十二卷存留照用指揮二卷詔以乾道重修爲名自八年正月朔行之

按文獻通考六年祕書少監權刑部侍郎汪大猷等重修敕令格式百二十二卷存留照用指揮二

卷詔以乾道重修敕令格式爲名

乾道八年正月班乾道敕令格式是年詔徒以上罪入禁三月刑部置籍以督之又詔大臣按閣以

察刑寺稽違 按宋史孝宗本紀乾道八年正月庚午朔班乾道敕令格式 按刑法志六年刑部

侍郎汪大猷等上其書號乾道敕令格式八年頒之當是時法令雖具然更一切以例從事法當然而無例則事皆泥而不行甚至隱例以壞法賄賂既行乃爲具例又時州縣獄禁淹延八年詔徒以上罪入禁三月者提刑司類申刑部置籍立限以督之其後又詔中書置禁奏取會籍大臣按闕以察刑寺稽違與夫不應問難而問難不應會而會者

淳熙元年正月禁淮西諸關採伐林木又禁兩淮耕牛出境五月班檢驗格目十月詔除乾道刑名斷例及獲盜推賞例外並不許用例按宋史孝宗本紀淳熙元年正月乙未禁淮西諸關採伐林

木丙午禁兩淮耕牛出境五月壬寅班鄭興裔所創檢驗格目按刑法志淳熙初浙西提刑鄭興

裔上檢驗格目詔頒之諸路提刑司凡檢覆必給三本一申所屬一申本司一給被害之家又淳熙

初詔除刑部許用乾道刑名斷例司勳許用獲盜推賞例并乾道經置條例事指揮其餘並不得引

例按文獻通考淳熙元年五月詔頒浙西提刑鄭興裔檢驗格目于諸路提刑司初興裔言諸

州縣檢驗之弊遂措置格目行下所屬州縣每一次檢驗依立定字號用格目三本一申所屬州縣

一付被害之家一申本司照會州縣受詞差官檢官受牒起發皆注日時于上關防詳密州縣不得

爲欺朝廷善之乃行于諸路十月詔六部除刑部許用乾道所修刑名斷例及司勳許用編類獲盜推賞例并乾道元年四月十八日經置修例敝事指揮內立定合引例外其餘並依成法不許用例先是臣僚言今之有司既問法之當否又問例之有無夫法之當否人所共知而例之有無多出吏手往往隱匿其例以阻壞良法甚者賄賂既行乃爲具例爲患不一請詔有司應事有在法灼然可行而未有此例者不得以無例廢法事下六部看詳至是來上乃有是詔

淳熙二年十二月丙申更定強盜賊法 按宋史孝宗本紀云云

淳熙三年三月置六部編敕司十月嚴禁踰侈 按宋史孝宗本紀淳熙三年三月己未置六部編敕司十月丁丑命臨安守臣嚴禁踰侈 按刑法志臣僚言乾道新書尙多牾牴詔戶部尙書蔡忱詳定之凡刪改九百餘條號淳熙勅令格式帝復以其書散漫用法之際官不暇徧閱吏因得以容奸令敕令所分門編類爲一書名曰淳熙條法事類前此法令之所未有也四年七月頒之 按

玉海淳熙三年以乾道新書編削未盡多有牾牴詔刊修明年書成一百四十八卷

淳熙四年二月戊子立邊人逃入溪洞及告捕法七月辛丑禁江上諸軍盜易戰馬甲寅申嚴四川

入蕃茶禁甲子班淳熙重修敕令格式八月辛巳禁耕牛過淮 按宋史孝宗本紀云云 按刑法志孝宗究心庶獄每歲臨軒慮囚率先數日令有司進款案披閱然後決遣法司更定律令必親爲訂正之丞相趙雄上淳熙條法事類帝讀至收驛馬舟船契書稅曰恐後世有算及舟車之譏戶令戶絕之家許給其家三千貫及二萬貫者取旨帝曰其家不幸而絕及二萬貫乃取之是有心利其財也又捕亡律公人不獲盜者罰金帝曰罰金而不加罪是使之受財縱盜也又監司知州無額上供者賞帝曰上供旣無額是白取于民也可賞以誘之乎并令削去之其明審如此 按玉海四年八月三日戊子進重修敕令格式御筆圈去戶令一條捕亡令一條及無額上供賞並刪去 淳熙五年二月辛未詔二廣毋以攝官人治獄丁丑禁解鹽入京西界五月丁未禁諸路州軍責屬縣進羨餘六月庚午飭百官及諸監司毋得請托癸未詔京西湖北商人以牛馬負茶出境者罪死七月癸未禁砂毛錢十月乙卯軍民謹叟者執送大理寺鞫之十一月丙寅詔軍民喧闐者並從軍法史浩言民不宜律以軍法不聽庚辰復監司互察法 按宋史孝宗本紀云云

淳熙六年正月詔纂淳熙條法事類二月詔毋擬貸逃軍犯強盜者十二月班重修敕令格式又詔

鞫賊吏母以原貸坐失入 按宋史孝宗本紀淳熙六年二月午丙詔逃軍犯強盜者毋擬貸十二月丙戌班重修淳熙敕令格式己亥詔自今鞫賊吏後雖原貸者毋以失入坐獄官 按玉海六

年正月庚午趙雄奏士大夫罕通法律吏得舞文今若分門編次聚于一處則遇事悉見吏不能欺乃詔敕局取敕令格式申明體倣吏部七司條法總類隨事分門纂爲一書

淳熙七年五月申擅刻書籍禁上淳熙條法事類 按宋史孝宗本紀淳熙七年五月己卯申飭書

坊擅刻書籍之禁 按玉海六年詔敕局取敕令格式申明體倣吏部七司條法總類隨事分門

纂爲一書七年五月二十八日成書四百二十卷爲總門二十三別門四百二十以明年三月一日頒行賜名條法事類

淳熙八年四月復強盜配隸法是年又詔強盜抵死貸命者刺強盜二字于額上 按宋史孝宗本

紀淳熙八年四月庚申復以強盜配隸諸軍重役 按文獻通考八年詔自今強盜抵死特貸命

之人並于額上刺強盜二字餘字分刺兩頰

淳熙九年八月壬子定諸州官捕蝗之罰十一月戊辰朔禁臣庶之家婦飾僭擬 按宋史孝宗本

紀云云

淳熙十年六月戊戌監察御史陳賈請禁僞學庚申嚴賊吏禁九月丙寅嚴盜販解鹽法丁亥禁內郡行鐵錢 按宋史孝宗本紀云云

淳熙十一年四月癸未重班紹興申明刑統五月癸卯命刑部大理寺議減刺配法十一月壬寅禁福建民私有兵器 按宋史孝宗本紀云云 按玉海淳熙十一年臣僚言刑統繇開寶元符間申明訂正凡九十有二條目曰申明刑統同紹興格式敕令爲一書自乾道書成進表雖有遵守之文而此書印本廢而不載淳熙新書不載遵守之文而印本又廢而不存讞議之際無所據依乞仍鏤板附淳熙隨敕申明之後

淳熙十二年三月辛卯禁習渤海樂

淳熙十三年二月甲寅詔強盜兩次以上雖爲從論死九月乙巳詔僞造會子凡經行用並處死 按以上俱宋史孝宗本紀云云

淳熙十四年詔有司決罪人不當仍于案後收坐小節不完不逮獄吏囚有死者必究其致死之由

又敕裁定配隸黥面之法 按宋史孝宗本紀不載 按刑法志紹興法鞫獄官推勘不得實故有

不當者一案坐之乾道法又恐有移替事故者卽致淹延乃令先決罪人不當官吏案後收坐至是

所司請更定死罪依紹興法餘依乾道施行從之其後有司以覆勘不同則前官有失入之罪往往

雷同前勘帝知其弊十四年詔特免一案推結一次于是小大之獄多得其情二廣州軍獄吏畏憲

司點檢送勘之害凡有重囚多斃于獄臣僚以爲請乃詔二廣提刑司詳覆公事若小節不完不須

追逮獄吏委本州究實保明遇有死者必根究其所以致死 又南渡後諸配隸祥符編敕止四十六

條慶曆中增至百七十餘條至于淳熙又增至五百七十條則四倍于慶曆矣配法旣多犯者日衆

黥配之人所至充斥淳熙十一年校書郎羅點言其太重乃詔刑寺集議奏聞至十四年未有定論

其後臣僚議以爲若止居役不離鄉井則幾惠姦不足以懲惡若盡用配法不恤黥刺則面目一壞

誰復顧藉強民適長威力有過無由自新檢照元豐刑部格諸編配人自有不移不放及移放條限

政和編配格又有情重稍重情輕稍輕四等若依倣舊格稍加參訂如入情重則倣舊刺面用不移

不做之格其次稍重則止刺額角用配及十年之格其次稍輕則與免黥刺用不刺面役滿放還之

格其次最輕則降爲居役別立年限縱免之格儻有從坐編管則置之本城減其放限如此則于見行條法並無牴牾且使刺面之法專處情犯凶蠢而其他偶麗于罪皆得全其面目知所顧藉可以自新省黥徒銷奸黨誠天下之切務卽詔有司裁定其後迄如舊制

淳熙十六年二月詔官吏贓罪無貸是年臣僚奏請申明法令無得于狀外別求他罪違者重寘于法按宋史孝宗本紀不載按光宗本紀淳熙十六年二月己卯詔官吏贓罪顯著毋貸按文獻通考淳熙十六年臣僚言在律鞫獄者皆須依所告狀鞫若干本狀之外別求他罪者以入人罪論比年中外之獄聞于狀外求罪推尋愆咎鞫勘平生旁及他人干連禁繫豈無冤滯乞申明法令自今獄事無得于狀外求罪如有故行違戾者請重寘于法從之

光宗紹熙三年二月丁酉申嚴錢銀過淮之禁閏月丙午禁郡縣新作寺觀壬戌詔州縣未斷之訟監司毋得移獄違者許執奏六月辛丑朔詔禁民奢侈按宋史光宗本紀云云

寧宗慶元二年二月復置修敕令所五月申嚴獄囚瘐死之罰按宋史寧宗本紀慶元二年五月

乙酉申嚴獄囚瘐死之罰按玉海慶元二年二月丙辰復置編修勅令所遂抄錄乾道五年正月

至慶元二年十二月終續降指揮得數萬事叅酌淳熙舊法五千八百條刪修爲書總七百二冊勅令格式及目錄各百二十二卷申明十二卷看詳四百三十五冊四年九月丙申上之

慶元三年三月壬寅詔自今有司奏讞死罪不當者論如律六月閏月甲戌內出銅器付尙書省毀之命申嚴私鑄銅器之禁 按宋史寧宗本紀云云

嘉泰元年正月丁卯命路鈐按閱諸州兵士毋受饋遺及擅招軍違者寘諸法四月甲申命臨安府察姦民縱火者治以軍法 按宋史寧宗本紀云云

嘉泰二年六月禁都民以火說相驚八月上慶元條法事類是年請降旨凡有殺傷受財私和者計贓論罪 按宋史寧宗本紀嘉泰二年六月辛卯禁都民以火說相驚者八月甲午謝深甫等上慶元條法事類 按玉海嘉泰二年八月二十三日上慶元條法事類四百三十七卷書目云八十

卷元年詔編是書 按文獻通考寧宗嘉泰二年臣僚言近日大辟行兇之人鄰保逼令自盡或使之說誘被死家賂之財物不令到官嘗求其故始則保甲憚檢視之費避證佐之勞次則巡尉憚于檢覆又次則縣道憚于鞫勘結解上下蒙蔽只欲省事不知置立官府本何所爲今若縱而不問

則是被殺人者反爲妻子親戚乞錢之資甚可痛也請明降旨揮凡有殺傷人處如都保不曾申官州縣不差官檢覆及家屬受財私和許諸色人告首並合從條究治其行財受和會之人更合計贓論罪從之

嘉泰三年七月辛未頒慶元條法事類 按宋史寧宗本紀云云

嘉泰四年二月立避親格五月詔坐舉將材不如所舉者七月命措置保伍法十二月禁挾私沒民產是年分配隸爲兩等 按宋史寧宗本紀嘉泰四年二月己未立試刑法避親格五月乙亥詔諸軍主帥各舉部內將材三人不如所舉者坐之七月戊子命諸路提刑提舉司措置保伍法十二月壬寅禁州縣挾私籍沒民產 按刑法志嘉泰四年臣僚言配隸之人蓋有兩等其鄉民一時鬪毆殺傷及胥徒犯贓貸命流配等人設使逃逸未必能爲大過止欲從徒配本州牢城重役限滿給據復爲良民至于累犯強盜及聚衆販賣私商曾經殺傷捕獲之人非村民胥吏之比欲並配屯駐軍立爲年限限滿改刺從正軍從之其所配之地自高宗來或配廣南海外四州或配淮漢四川迄度宗之世無定法皆不足紀也

開禧元年三月辛未申嚴民間生子棄殺之禁六月己巳右執法陳自强等上新修淳熙以後吏部七司法七月壬午詔路提刑提舉司措置保甲九月庚子詔官吏犯贓追還所受如舊法十一月乙未申嚴告許之禁 按宋史寧宗本紀云云

開禧二年正月辛亥詔坑戶毀錢爲銅者不赦仍籍其家著爲令三月甲午頒開禧重修七司法 按宋史寧宗本紀云云

嘉定三年六月己卯詔三衙江上四川諸軍主帥核實軍籍欺冒者以贓論 按宋史寧宗本紀云云

嘉定四年二月詔重罪格振恤令及不卽捕盜者是年又詔以絹計贓照鐵錢二當銅錢一又頒正背人形諸路檢驗 按宋史寧宗本紀嘉定四年二月閏月辛亥詔諸路帥臣監司守令格朝廷振

恤之令及盜發不卽捕者重罪之 按刑法志嘉定四年詔以絹計贓定罪者江北鐵錢依四川法二當銅錢一江西提刑徐似道言檢驗官指輕作重以有爲無差訛交互以故吏奸出入人罪乞以湖南正背人形隨格目給下令于傷損去處依樣朱紅書畫唱喝傷痕衆無異詞然後署押詔從之

頒之天下

嘉定六年六月詔歲終上未決獄罪其最久者十月申嚴互送禁是年起居舍人奏釋楮幣苛禁又太學博士奏請刪定近制按宋史寧宗本紀嘉定六年六月乙亥詔刑部歲終上諸州未決之獄于尚書省擇其最久者罪之十月丁酉朔申嚴互送之禁按續文獻通考宋寧宗嘉定六年起

居舍人真德秀奏釋楮幣苛禁其略曰頃者朝廷以楮幣日輕行新令慮士大夫奉行不恪于是威之以褫奪竄斥之刑慮民之虧減牟利于是儆之以沒入家貨之罰中外有司苟能體朝廷之意擇其甚者而加懲則人孰不畏迺有未嘗玩令而以玩令言未嘗誤國而以誤國劾或因僚屬之讒而不究其實或因豪強之謗而輒徇其私是豈朝廷立法之本意耶至若籍沒之刑尤多濫及蓋有胥吏利其多貲而因以傾奪者矣有閭巷平時睚眦而因以中傷者矣夫估籍之禍甚于刑誅刑誅雖酷痛止其身貲財一空盡室溝壑今乃不量其輕重而驟施之亦豈朝廷立法之本意耶伏望深詔輔臣稽叅衆論凡州縣官有因奉行新券爲監司守臣按刻追削居住其倚法漁利重爲公私之蠹者自無足議其間咎犯稍輕及止緣才術短拙情在可矜者當此郊需之餘量行牽復許之自便至

于估籍一節雖令申審然展轉經營縱幸獲免已亡其半謂宜明勅監司守令自今民間有違犯約束諭告勿悛者止當嚴實典憲不許更籍其家亦足以廣聖朝維新之澤又太學博士許應龍奏請刪定近制其略曰臣聞有法之弊有例之弊法之弊易見例之弊難革法而用例此今日之大患也夫著而爲律疏而爲令編次成書各有條目蓋截然而不可易也是雖有旁照有通用舞文弄法者固未免輕重出入于其間然使有司精明詳考而熟究之其奸莫能逃也豈不曰法之弊易見乎乃若例者或出于一時之特恩或出于一時之權宜有徇親故而開是例者有迫于勢要而創是例者揆之于法大相牴牾而後來者扳援不已案牘在俗吏之手有司不可得而知也求者執已行之比有司不得而拒也豈不曰例之弊難革乎今百司庶府循積習之弊舍法而用例焉非不知三尺之皆違也執而不行恐至于拂人情甚至招衆怨遂使胥吏得以執其柄而容其私厚賂以賈之則以爲有例之可行請求之未至則匿其例而不用長吏知之而不能禁天下交病之而不敢言昔韓琦目擊其弊取其可用者而刪其冗繆是以吏無所容其奸今莫若明詔有司搜求前後已用之例公其參酌可行者留之不可行者去之使輕重得宜于法意不相違戾編爲成書藏之有司凡有陳啟

據此施行若是書所不載者皆抑而不予庶幾權不在吏而奔競妄求者無所容其巧矣

嘉定八年正月戊子申嚴銷金鋪翠之禁五月甲申詔賊吏毋得減年參選著爲令七月甲申詔職田蠲放如民田違者坐之 按宋史寧宗本紀云云

嘉定十年七月庚子詔諸將軍佐有罪者送屯駐州鞠之罷軍士淫刑 按宋史寧宗本紀云云

嘉定十三年詔凡在官財物不應用而用之依律科罪 按宋史寧宗本紀不載 按文獻通考嘉定十三年詔凡在官財物不應用而用之依律科坐贓罪之人自今私自入己者爲贓罪私自饋遺者爲私罪用充公用者爲公罪創始者爲首坐以全罪循行者爲從與減一等

嘉定十六年正月詔官犯贓毋免二月臣僚奏請檢驗失實不許原免八月申嚴船舶銅錢禁 按宋史寧宗本紀嘉定十六年正月戊申詔命官犯贓毋免約法八月癸未申嚴船舶銅錢之禁按續文獻通考十六年二月臣寮奏檢驗不同要害致命之因法至嚴矣而檢驗失實則爲覺舉遂以苟免欲望睿旨下刑部看詳頒示遵用刑寺長貳詳議檢驗不實當覺舉自有見行條法今看詳命官檢驗不實或失當不許用覺舉原免餘並依舊法施行從之

理宗寶慶元年八月丁巳詔戒貪吏十二月甲辰詔刪修敕令 按宋史理宗本紀云云 按刑法志理宗寶慶初敕令所言自慶元新書之行今二十九年前指揮殆非一事或舊法該括未盡文意未明須用續降參酌者或舊法原無而後因事立爲成法者或已有舊法而續降不必引用者或一時權宜而不可爲常法者條目滋繁無所遵守乞考定之

寶慶三年五月閏月己卯朔詔郡縣繫囚千實書歷未經結錄守臣輒行特判憲司其詳覆所部獄案歲月淹延者重寘于憲 按宋史理宗本紀云云

紹定二年二月庚戌詔舉廉吏或犯姦贓保任同坐監司守臣其申嚴覺察 按宋史理宗本紀云云

端平元年四月申嚴州郡不贍給宗親者制其刑十一月詔諸路奏讞以所發日月申御史臺究省部寺之違慢者 按宋史理宗本紀端平元年四月丁丑詔比年宗親貧窶或至失所甚非國家睦族之意大宗正司南外西外宗正司其申嚴州郡以時贍給違者有刑 按刑法志理宗時往往讞不時報囚多瘐死監察御史程元鳳奏曰今罪無輕重悉皆送獄獄無大小悉皆稽留或以追索未